

## **Zirka 3mm ab Boodä.**

S'isch wieder sonä Tag g'syy – rrych und erfüllt.  
Wo all diä chlyynä Wunder sich miär hend enthüllt.  
Jetz ruäh' ich vor'em Hüüs – a myy'm Abigplatz  
Lah d'r Tag Revue passiärä und dänk' a Dich myy Schatz

Lyyt's am Sunnäundergang oder lyyt's am Rosäduft  
Ä wundervolli Harmonie erfüllt diä ganzi Luft.  
Laht mich ganz yytäuchä i der choschtbari Momänt  
Weckt i miär ä Wärtshätzig wo schtüünend erkännt.

So läächt abg'hobä – zirka 3 Millimeter ab Bodä.  
Und iber miär ä Himmel – magisch durzogä.  
Dü bisch miär nooch - ich bi mir Diär glücklich verwobä.  
Scheen isch's - ich föhlä mich guät üffg'hobä.

S'isch wieder sonä Tag g'syy – rrych und erfüllt.  
Wo all diä chlyynä Wunder sich miär hend enthüllt.  
Ich ruähä vor'em Hüüs a myy'm Abigplatz  
Lah d'r Tag Revue passiärä und bi mit Diär myy Schatz.

Äs lyyt nit am Sunnäundergang – äs lyyt nit am Rosäduft  
Diä wundervolli Harmonie wo erfüllt diä ganzi Luft.  
Schwingt us myy'm tiäfschtä Innärä – hiä im Momänt.  
Weckt i miär ä Wärtshätzig - wo schtüünend erkännt.

So läächt abg'hobä – zirka 3 Millimeter ab Bodä.  
Und iber miär ä Himmel magisch durzogä.  
Dü bisch miär nooch - ich bi mir Diär glücklich verwobä.  
Scheen isch's - ich föhlä mich guät üffg'hobä.